

THAKHOLO EA LETS'OLO LA
PASEKA LA BOIPABALLO 'MILENG
KA LA 09 'MESA 2019 MASERU
DAY HIGH SCHOOL KA 10:00
HOSENG KA MOHLOMPHEHI
MOKHERANE TSATSANYANE -
MOTLATSI OA LETONA LE
KHABANE LA MESEBETSI E
MEHOLO LE LIPALANGOANG LE
SEPHETHE PHETHE

Motsamaise oa Lits'ebeletso,

ntumelle ke ise hlomphe ho:

Motlotlehi Khosi Letsie oa Boraro

Mohlomphehi Tona-Kholo ea 'Muso oa Motlotlehi

**Mohlomphehi Motlatsi oa Tona-Kholo ea 'Muso oa
Motlotlehi**

Matona a Khabane a 'Muso oa Motlotlehi

Mookameli oa Sesole

Mookameli oa Sepolesa

Mookameli oa Boipaballo 'mileng

**Mookameli oa Lekalana la Lipalangoang le
Sephethe-phethe**

Liofisiri tse kholo tsa 'Muso

Basebeletsi ba Sechaba

Baruti ba Moshoeshe

Bana ba Likolo

Bo 'M'e le bo Ntate

Ntumelleng ke le lumelise, ke ka thabo e kholo ho 'na kajeno hore ebe re 'moho ka mafapha 'ohle thakholong ena ea le leng la mats'olo a Boipaballo 'Mileng. Katleho ea mat'solo a Boipaballo 'Mileng, kante le tikatiko a its'etlehile ka ts'ehetso ea bohle ba chang bats'ola litabeng tsa tseleng, 'muso o keke oa tseba ho hlola mathata a hlahelang basebelise bohle ba tsela, ntle le thuso ea lona bohle.

Sechaba sa heso

Thakholo ena ea lets'solo la paseka la Boipaballo 'Mileng le tsoaloa ke lithuto tsa rona tsa bolumeli le ke ho latela molao oa motheo oa naha ena ea Lesotho. Tsena tse peli li re ruta tse latelang:

- Rata ua heno joalo ka ha o ithata,'me o etse ho e mong seo o ka thabelang ha se etsoa ho oena;
- Hlompha motho e mong joalo ka ha a na le tokelo ea ho phela a hlomphuoa.

Tsena le tse ling tsa boleng bo ts'oanang, ke tsona tse ka sehlohlolong kutloisisong e ts'oanang le ho haseng ha melaetsa ea Boipaballo 'Mileng.

Metsoalle le basebetsi 'moho

Mohoo oa lets'olo lena ke "Polokeho ea Litaaso, Ba Palami le Ba Qhobi" (Pedesatrian Safety and Passenger and Driver safety). Lekala la heso, joalo ka ha bohle le tseba, ke lona le fuoeng boikarabello baho etsa litsela le ho fa lipalangoang litumello tsa ho tsamaisa baeti le thepa, mme likotsi le mafu a mebileng li tsoaloa ka ho otloloha ke moo litaaso le makoloi, makoloi le makoloi a mang li tsekisanang tsebeliso ea tsela.

Nakong ena ea selemo, re elelloa Bakreste ba bangata ba nkang maeto a bona a bo-Kreste 'mebileng ea rona, hoea libakeng tse fapakaneng tsa ho ea khumamela Morena Molimo. Selemo se seng le se seng re bona keketseho ea maeto a mofuta ona, a malapa le bahahlauli 'mebileng ea rona. Ke hampe le ka bomalimabe hore e be selemo ka seng ka nako ena litsela tsa rona eba lifi tseo maphelo a mangata a lahlehang ka lebaka la boitsoaro bo sa amoheleheng le tumelong ea rona ea bo-Kreste.

- Ha re qhoba tseleng makoloi a seng maamong a nepahetseng ke lets'oao la ho se natse maphelo a batho.
- Ha o sa fase lebanta la pholoho haole ka koloing le ngoana osa mots'oare ka lebanta la pholoho, hoo ke ho se natse maphelo a bona.
- Ha re seha tsebe moo ho hlakileng hore ha hoa ts'oaneloa ho sea tsebe, hoo ke ho se natse molao oa tsela oa naha. 'me litlamorao tsa taba tse joalo, ke ho hlahisa likotsi tse sa hlokahaleng ho baahi ba Lesotho.
- Ho khanna hampe le ho se tsotelle lebelo la molao ke ho se hlomphe molao oa tsela.
- Ha batho ba noa mothamahane, pele ba nka maeto ka likoloi, ke ho bea maphelo a mangata kotsing.
- Ha re bonts'a ho se mamellane tseleng, le ho pheha khang, likotsi li ka qetella li hlahetse beng ba makoloi a joalo.

Lekhotla la machaba a kopaneng litabeng tsa Boipaballo 'mebileng li khethile lilemo tse leshome (2011- 2020) ele lilemo tseo litho tsa lekhotla lena li lebeletsoeng ho sebetsa ka thata ho fokotsa likotsi tsa 'mebileng ka karolo ea mashome a mahlano lekholong ka selemo sa 2020.

Lipalo palo li bonts'a hore likotsi tsa tseleng ka 2018 li bile kete tse 'ne, makholo a ts'eletseng, mashome a mararo a metso e meraro (4633) khahlanong le kete tse 'ne, lekholo le mashome a supileng le motso o le mong (4171) ka 2017. Batho ba hlokahetseng ka 2018 ke makholo a mararo le mashome a supileng a nang le metso e mene (374) khahlanong le makholo a mabeli le mashome a robong le metso e mehlane (295) ka 2017.

Ka 'Mesa 2018 batho ba hlokahetseng tseleng ba bile mashome a mabeli (20) khahlanong le makholo a mararo a metso e mehlano (35) ka 'Mesa 2017. Batho ba hlahileng likotsi tseleng ka 'Mesa 2018 ba bile mashome a robong a metso e mene (94) khahlanong le makholo a mabeli le mashome a mahlano a metso e supileng (257) ka 'Mesa 2017.

Sello saka se ea ho ba khanni ba libese le baqhobi ba makoloi a manyane a baeti hore ha ba khannela baeti ba be hlokolosi, ele ho boloka maphelo a bona nakong ena ea phomolo ea Paseka.

Mantsoe le liteboho tse khethehileng li ea ho ba boloki ba molao le ts'ireletso, le ba li tima mollo, le ba lits'ebeletso tsa tsohanyetso.

Kea leboha ka boikitlaetso bohle ho bolokeng maphelo litseleng tsa Lesotho.

Ke qetela ka ho leboha ts'ehetso e sa thekeseleng kamehla ea Road Fund litabeng tsa Boipaballo 'Mileng, 'me ke leboha e mong le e mong ea teng kajeno ho atlehisa thakholo e na ea Lets'olo lena la Boipaballo 'Mileng.

Ka hona ke phatlalatsa lets'olo lena le butsoe ka molao

Kea leboha.

KHOTSO

PULA

NALA